

АДАМ ҚҰҚЫҚТАРЫНЫҢ ЖАЛПЫҒА БІРДЕЙ ДЕКЛАРАЦИЯСЫ

ПРЕАМБУЛА

Адам баласы үйелменінің барлық мүшелеріне тән қадір-қасиетін, құқықтарының теңдігі мен тартып алынбайтындығын тану, бостандық пен әділдіктің және жалпыға бірдей бейбітшіліктің негізі болып табылатынына назар аударар отырып,

адам құқықтарына деген елеушілік, менсінбеушілік адам баласы арының зығырданын қайнататын тағылық жағдайға әкеліп соғатынына және дүние жүзі адамдары сөз бен наным-сенім бостандықтарына ие болып, үрей мен мұқтаждықтан ада бола алатын ортаны құру – адам баласының жоғары мәртебелі ұмтылысы деп жарияланғанына назар аударар отырып,

адам баласы зорлық-зомбылық пен қанауға қарсы көтеріліске мәжбүр болатын жағдайды тудырмау үшін, адам құқықтары заң билігімен қорғалуы керек екеніне назар аударар отырып,

халықтар арасында достық қарым-қатынастың дамуына жәрдемдесу керек екеніне назар аударар отырып,

Біріккен Ұлттар елдері өз Жарғысында негізгі адам құқықтарына, жеке адам басының қадір-қасиеті мен құндылығына және ерлер мен әйелдердің теңдігіне сенімдерін растап, әлеуметтік прогресс пен адамға ылайық өмір сүру деңгейін, нақтыланған бостандықтардан тыс, кең ауқымды бостандықтарды арттыруға жәрдемдесу керек деген шешімге келгендеріне назар аударар отырып,

мүше-мемлекеттер Біріккен Ұлттар Ұйымымен ынтықтамаса отырып, адам құқықтары мен негізгі бостандықтары жалпыға бірдей құрметтеліп сақталуына ықпал жасауға міндеттенгендеріне назар аударар отырып,

осы міндеттемелерді толыққанды жүзеге асыру жолында осы құқықтар мен бостандықтардың мән-мағынасы мен ерекшеліктерін ұғынып түсінудің маңызы зор екендігіне назар аударар отырып,

БАС АССАМБЛЕЯ,

Адам құқықтарының жалпыға бірдей Декларациясын бүкіл халықтар мен мемлекеттердің ұмтылыстары арқылы әр адаммен қатар, қоғамның әр органы осы декларацияны үнемі жадында тұтып, білім беру және ағарту жұмыстары арқылы осы құқықтар мен бостандықтарды қадір тұтуға ықпал жасап, ұлттық халықаралық шаралар арқылы Ұйымның мүше-мемлекеттерінің халықтарымен қоса, олардың юрисдикциясына қарасты территориялардың халықтары арасында да, жалпыға бірдей тиімді түрде танылып, жүзеге асырылуы үшін алға қойылған мақсат ретінде жария етіп отыр.

1 бап

Барлық адамдар тумысынан азат және қадір-қасиеті мен құқықтары тең болып дүниеге келеді. Адамдарға ақыл-парасат, ар-ождан берілген, сондықтан олар бір-бірімен туыстық, бауырмалдық қарым-қатынас жасаулары тиіс.

2 бап

Әр адам, нәсіліне, түр-түсіне, жынысына, тіліне, дініне, саяси немесе басқа да наным-сенімдеріне, ұлттық, немесе әлеуметтік тегіне, мүлкітік, тектік-топтық, немесе басқа да жағдаяттарға қарамастан осы Декларацияда жарияланған барлық құқықтар мен бостандықтарға алаланбай, бірдей тең ие болуы тиіс.

Сонымен қатар, ешкім де өзі тұратын елінің, не болмаса территорияның саяси, құқықтық, немесе халықаралық мәртебесінің негізі бойынша, және де ол территория тәуелсіз, әлде біреудің қарамағында, әлде өзін-өзі басқарушы емес, немесе оның егемендігі әртүрлі нысанда шектеулі болған күннің өзінде де, алаланбауы тиіс.

3 бап

Әр адам өмір сүруге, бостандықта болуға және оның жеке басына қол сұғылмауына құқылы.

4 бап

Ешкім де құлдықта немесе кіріптарлықта ұсталуы тиіс емес. Құлдық пен құл саудасына, қандай түрде болса да, тыйым салынады.

5 бап

Ешкім де азапталуға немесе қадір-қасиетін қорлайтындай адамшылыққа жатпайтын қатыгездік жолмен жәбірленуге, немесе жазалануға тиіс емес.

6 бап

Әр адам қай жерде жүрсе де, құқықтық субъектісі ретінде танылуына құқылы.

7 бап

Заң алдында жұрттың бәрі тең және де заң арқылы алаланбай, бірдей тең қорғалуға құқылы. Барлық адам осы Декларацияның ережелерін бұзатын кемсітуден және кемсітуге арандатушылықтың барлық түрінен тең қорғалуға құқылы.

8 бап

Әр адам, конституциямен, немесе заңмен берілген негізгі құқықтары бұзылған жағдайда, құқығын құзыретті ұлттық сот арқылы тиімді түрде қалпына келтіруге құқылы.

9 бап

Ешкім де негізсіз тұтқындалуға, қамауда ұсталуға немесе қуғынға ұшыратылуға тиіс емес.

10 бап

Әр адам, өзінің құқықтары мен міндеттерін анықтап, өзіне тағылған қылмыстық айыптаудың негізділігін белгілеу үшін, ісі толық теңдік негізінде, әділеттік талаптарға сай, тәуелсіз және әділ сот арқылы ашық қаралуына құқығы бар.

11 бап

Қылмыс жасады деп айыпталған әр адам, қорғану құқығы қамтамасыздандырылып, заңды және ашық сот талқылауы оның кінәсін толық анықтағанға дейін, кінәсіз деп есептелуге құқығы бар.

Ешкім де жасаған әрекеті немесе әрекетсіздігі негізінде, егер ол әрекеті ұлттық заңдар мен халықаралық құқық бойынша қылмыс болып саналмаса, жауапқа тартылмайды. Сонымен қатар қылмыс үшін берілген жаза, қылмыс жасалған кезде заңмен көзделген жазадан ауыр болмауға тиіс.

12 бап

Әр адам жеке және отбасылық өміріне өзгелердің өз бетінше араласуынан, озбырлық жасап баспанасына, хат жазысып-алысу құпиясына қол сұғуынан, ар-намысы мен абырой беделіне нұқсан келтіруінен қорғалуға құқығы бар.

13 бап

Әр адамның әр мемлекеттің ішінде жүріп-тұруына және өз қалауынша тұратын мекен-жайды таңдауына құқығы бар.

Әр адам кез-келген елден, соның ішінде өзінің туған елінен, басқа елге қоныс аударуға және өз еліне қайтып оралуға құқылы.

14 бап

Әр адамның қуғынға ұшыраған жағдайда, басқа елдерден баспана іздеп және сол баспананы пайдалануға құқығы бар.

Бұл құқық шынтуатында саяси емес қылмыстың негізінде, немесе Біріккен Ұлттар Ұйымының мақсаттары мен қағидаларына қайшы келетін әрекеттері үшін қуғындалғандарға жүрмейді.

15 бап

Әр адамның азаматтыққа құқығы бар.

Ешкімді де азаматтығынан немесе азаматтығын өзгерту құқығынан еріксіз айыруға болмайды.

16 бап

Кәмелеттік жасқа толған ерлер мен әйелдер өздерінің нәсіліне, ұлтына, дініне қарамастан некеге тұрып, отбасын құруға құқылы. Олар некеге тұрған, некеде болған және ажырасқан кезде бірдей құқықтарды пайдаланады.

Неке, тек екі жақтың өзара еркін және толық келісімі бойынша ғана қиылады.

Отабасы қоғамның табиғи және негізгі ұясы болып табылады, және қоғам мен мемлекет тарапынан қорғалуға құқылы.

17 бап.

Әр адамның дүние мүлiктi жеке өзi, немесе басқалармен бiрлесiп иемденуге құқығы бар.

Ешкiм де өз мүлкiнен ерiксiз айрылмауға тиiс.

18 бап

Әр адам ой-пiкiр, ар-ождан және дiн бостандығына құқығы бар; бұл құқық өз дiнiн немесе наным-сенiмiн өзгерту еркiндiгiн, өз дiнiн, наным-сенiмiн жеке өзi, немесе басқа адамдармен бiрiгiп тұтып, жария түрде, немесе жеке жолмен уағыздау, құдайға құлшылық ету, дiни салт-жораларын орындау бостандығын да қамтыйды.

19 бап

Әр адам наным-сенiм бостандығына және өз көзқарасын еркiн бiлдiруiне құқығы бар; бұл құқық өз наным-сенiмiн кедергiсiз ұстану еркiндiгiн және мемлекеттiк шекаралар тәртiбiне тәуелдi болып қалмай, ақпараттар мен идеяларды еркiн iздеп, кез-келген құралдар арқылы тарату бостандығын да қамтыйды.

20 бап

Әр адамның бейбiт жиналыстар және ассоциацияларды құру бостандығына құқығы бар.

Ешкiмдi де белгiлi бiр ассоциацияға зорлықпен кiргiзуге болмайды.

21 бап

Әр адамның, өз елiн басқару iсiне тiкелей өзi, немесе ерiктi түрде сайланған өкiлдерi арқылы қатысуға құқығы бар.

Әр адам өз елiнде мемлекеттiк қызметке тең дәрежеде қол жеткiзуге құқылы.

Халықтың еркi үкiмет билiгiнiң негiзi болуы тиiс; бұл ерiк мерзiмдi және бұрмаланбаған сайлау арқылы жүзеге асырылуы тиiс . Сайлау жалпыға бiрдей тең сайлау құқығы негiзiнде, жасырын дауыс беру жолымен, немесе осы сияқты сайлау бостандығын қамтамасыз ететiн басқа да, осы мәндес әдiстер арқылы өткiзiлiуi тиiс.

22 бап

Әр адам, қоғам мүшесi ретiнде, әлеуметтiк жағынан қамсыздандырылуына және оның қадiр-қасиетi қолдау табуына, жеке басы еркiн кемелденуiне қажеттi экономикалық, әлеуметтiк және мәдени салалар бойынша құқықтары әрбiр мемлекеттiң құрылымы мен ресурстарына сай, ұлттық ықпал және халықаралық ынтымақтастық арқылы жүзеге асырылуына құқығы бар.

23 бап

Әр адамның еңбек етуге, жұмыс түрiн еркiн таңдауға, әдiл және қолайлы еңбек жағдайына, жұмыссыздықтан қорғалуына құқығы бар.

Әр адамның құндылығы тең еңбегi үшiн, нендей бiр кемсiтүсiз, тең еңбек ақы алуына құқығы бар.

Жұмыс iстеп жүрген әр адам өзiнiң және отбасының ылайықты өмiр сүруiн қамтамасыз ететiндей әдiл және қанағаттанарлық, және, қажет болған кезде, басқа әлеуметтiк қамсыздандыру құралдары арқылы толықтырылып отыратын, сый-сияпатқа құқылы.

Әр адам кәсiподақтарын құруға және өз мүдделерiн қорғау үшiн, кәсiподақтарына кiруге құқылы.

24 бап

Әр адам тынығуға және мәдени демалуға, оның iшiнде ақылға қонымды шектеулi жұмыс күнiне және мерзiмдi ақылы демалысқа, құқылы.

25 бап

Әр адам өзiнiң және отбасы мүшелерiнiң ден-саулығын әл-ауқатын қамтамасыз ететiндей, тамақты, киiмдi, баспананы, медициналық күтiмдi қамтыйтын өмiр сүру деңгейiне құқылы және де жұмыссыз қалған күнде, науқас болған кезде, мүгедек болып қалған, жесiр болып қалған күнде, қартайған шақта, немесе өзiне байланысты емес басқа да себептермен тiршiлiк ету мүмкiншiлiгiнен айырылып қалған жағдайда қамсыздандырылуына құқылы.

Ана және нәресте болу жағдайы айрықша қамқорлық пен көмек алуға құқық бередi. Балалардың бәрi, некелi немесе некесiз туған, бiрдей әлеуметтiк қорғауды пайдаланады.

26 бап

Әр адамның білім алуға құқығы бар. Білім беру, ең болмағанда бастауыш және жалпы білім, тегін болуы тиіс. Бастауыш білім баршаға міндетті болуы тиіс. Техникалық және кәсіптік білім көпшіліктің қолы жетерліктей болуы тиіс және жоғары білім де, әркімнің қабілетіне қарай көпшіліктің қолы жетерліктей болуы тиіс.

Білім беру адамның жеке басының толық кемелденуіне және құқықтары мен негізгі бостандықтарына деген құрметті арттыруға бағытталуы тиіс. Білім беру барлық ұлттар, нәсілдік және діни топтары арасында түсіністік, шыдамдылық пен достық қарым-қатынас орнатуға ықпал жасап және Біріккен Ұлттар Ұйымының бейбітшілікті қуаттау жолындағы жұмысына ықпал жасап, дем беруі тиіс.

Ата-аналардың өздерінің жас балаларына білім беру түрін таңдауда құқығы басымды

27 бап

Әр адам қоғамның мәдени өміріне еркін қатысуға, өнерден рахат-ләззат алуға, ғылыми прогресске ат салысуға әрі оның игілігін пайдалануға құқылы.

Әр адам өзі автор болып табылатын ғылыми еңбегінің, әдеби немесе көркем шығармаларының нәтижесінде туындайтын рухани және материалды мүдделерін қорғауға құқылы.

28 бап

Әр адам осы декларацияда баянды етілген құқықтар мен бостандықтарды толық жүзеге асыра алатын әлеуметтік және халықаралық тәртіпке құқылы.

29 бап

Әр адамның, адам баласының еркін және толық кемелденуіне мүмкіншілік беретін қоғам алдында міндеттері бар.

Өзінің құқықтары мен бостандықтарын жүзеге асыруда әр адам тек басқа адамдардың құқықтары мен бостандықтарын тиісті түрде тану және құрметтеу мақсаты көзделген жағдайда ғана және демократиялық қоғамдағы моральдің, қоғамдық тәртіп пен игіліктің әділетті талаптарын қанағаттандыру мақсаты көзделген жағдайда ғана, заңмен белгіленген шектеуге ұшырауы тиіс.

Осы бостандықтар мен құқықтарды жүзеге асырылуы Біріккен Ұлттар Ұйымының мақсаттары мен қағидаларына қайшы келмеуі тиіс.

30 бап

Осы Декларациядағы ешбір қағида қасыбір мемлекетке, адамдар тобына немесе жеке адамдарға аталмыш Декларацияда баянды етілген құқықтар мен бостандықтарды жоятын қызметпен айналысу немесе іс-әрекет жасау құқығын береді деп пайымдалуы тиіс емес.